


ALAHADY FAHA 30 MANDAVANTAONA - A



TIA AN'ANDRIAMANITRA SY NY NAMANA NO MAHA-KRISTIANINA

Ry Kristianina havana, amin'izao Alahady faha 30 taona mandavantaona izay hamaranantsika ny volan'ny raozery izao dia fotokevitra lehibe no arosan'ny Eglizy ho sainintsainintsika sy ho alalanintsika ary hivelomantsika eo amin'ny fiainantsika andavanandro ka hahatonga antsika hanana fiainana mirindra, araka ny averimberina amintsika hahay hampitraotra ny fiainana andavanandro sy ny finoana hahatonga antsika ho Kristy mpiara-belona amin'olona. Ka izao Alahady izao dia ny fototry ny fiainantsika tokoa no antintranterin'ireo tenin'Andriamanitra androany dia ilay lazaina amin'ny fomba matetika hoe ; ny didiy roa lehibe izay mifamatotra sy mifameno ary mifampitohy dia ny fitiavana an'Andriamanitra sy ny fitiavana ny namana.

Izany no maha Kristianina antsika, maha mpiara-dàlana amin'i Kristy ka mahatonga antsika ho Kristy mpiara-belona amin'olona.

Nandritra ny volana oktobra izay volan'ny raozery dia nibanjina ireo misterin'ny famonjena antsika isika izany

hoe tsy manonona ny toko sapile fotsiny fa mampiditra ireo mystery rehetra ireo ao am-po tahaka ny nataon'i Masina Maria. Tsy hoe vita ny volan'ny raozery ka tapitra eo ny fiainana an'ireo mystery ireo, matoa isika nibanjina azy dia ny mba hitahiry azy ao am-po tahaka an'i Masina Maria koa. Raha ao am-pontsika mandrakariva ireo mystery ireo dia ho Kristianina marina isika, Kristy mpiara-belona amin'olona manatanteraka ny hafatr'i Jesoa isika.

Vakiteny I : Eks. 22, 21-27
Tononkira : Salamo 17
Vakiteny II : 1 Tes. 1, 5d-10
Evanjely : Mt. 22, 34-40

Ny hafatra androany dia ny fitiavana an'Andriamanitra sy ny fitiavana namana, vokatry izany dia isika ihany koa manaja ny hafa ary manaja ny tontolo iainantsika. Hiezaka tokoa isika araky ny averintsika matetika ho generation mpanorina fa tsy mpandrava isika raha manatanteraka io hafatra arosen'ny Eglizy ho antsika anio io.

Ny fivelomana an'izany no voalaza amin'ny bokin'ny Eksaody ao amin'ny vakiteny voalohany raha mananatra ireo vahoaka i Moizy sy mananatra antsika koa : "*Aza manao izay mampalahelo ny mpitondra tena sy ny kamboty; fa raha manao izay mampalahelo ireny ianao, dia hitaraina amiko izy, ka hohenoiko ny fitarainany; hirehitra ny hatezerako ka haringako amin'ny sabatra ianareo; ary ny vadinareo ho mpitondra tena, ny zanakareo ho kamboty.*"

Tian'Andriamanitra ho tsapantsika fa ny fifandraisana aminy ao anatin'ny fahamarinana sy fifankatiavana dia tsy maintsy miantefa amin'ireo manodidina fa indrindra amin'ireo madinika.

Aoka ny trosa ananantsika araky ny ampianaran'i Md Paoly mba ho trosam-pitiavana, aoka hifanasoa isika, hanao ny soa iombonana ka amin'izay manorina isika amin'izay hahay handavorary ny fiainantsika andavanandro. Lalana lehibe mahatonga Kristy Mpiara-belona antsika izay raha tanterantsika

I Jesoa ao amin'ny Evanjely, raha nisy nanontany azy ny làlam-piainantsika dia tsy inona fa ny fitiavana an'Andriamanitra sy fitiavana ny namana, io no hanahafantsika an'Andriamanitra ka iombonantsika aminy tanteraka.

Ny hoe mitia an'Andriamanitra sy mitia ny namana ary manaja ny tontolo iainana dia ny fanaovana ny marina ka hampanjaka ny rariny sy ny hitsiny amin'ireo manodidina antsika : manao soa ireo mahantra, mitady ny soa iombonana ary ny fivelomana an'izany dia mitondra antsika amin'ny fampihavanana marina izay averimberintsika matetika sy irintsika tokoa. Tsy ho tanteraka anefa izany raha tsy ao anatin'ny fahamarinana sy anatin'ny fampanjakana ny rariny sy ny hitsiny eo amin'ny fiainantsika andavanandro. Izany no hanahafantsika an'Andriamanitra.

Izany no ambaran'i Md Paoly ao amin'ny vakiteny faharoa raha miteny mivantana amin'ireo Kristianina tany Tesalonika izy, noderainy manokana izy ireo satria nahay nandray ny fampianarany sy ny Evanjely izy ireo : "*Noho ianareo nandray ny teny tamin'ny fahoriana be sy tamin'ny hafaliana avy amin'ny Fanahy Masina, dia tonga nanahaka anay sy ny Tompo ianareo, ka tonga fakàn-tahaka ho an'ny mpino rehetra any Masedônia sy Akaia kosa indray*"

Ry Kristianina havana, raha mivelona ireo didy roa lehibe izay tena mifameno isika dia zary Kristy mpiara-belona amin'olona tokoa isika ka zary fahazavana sy fanasina àry izany no làlana anorenantsika ny Eglizy olo, zary fianakavian'Andriamanitra isika ka olo araiky ao aminy.

Izany no irintsika amin'izao fidirantsika amin'ny volana novambra izay hibanjinantsika ihany koa ireo havantsika izay nialoha làlana antsika ka antombontsika amin'ny fankalazana an'ireo izay niaina ny didy lehibe roa mifamatotra tsy afaka misaraka dia ireo olona masina.

Masina izy ireo satria nivelona ireo didy napetrak'i Kristy dia tokana ihany fa samy FITIAVANA.

Ny fitiavana dia manao soa ho an'izay tiana sy mandray ny maha izy azy an'izay tiana. Izany hoe manome ny maha anao manontolo satria izay ny farantampony ary izany ny fitiavana ho an'izay tiana : mandray izay maha-izy araky ny maha-izy azy izay eo amin'ny fiainana iombonana aminy ka amin'izay zary olo araiky ao amin'Andriamanitra isika sy iray fahamasinana ao aminy.

Izany no antenaintsika raha mibanjina ireo olona masina isika amin'ny voalohany volana novambra ankalazaintsika tsy ho ela intsony.

Ry Jesoa Tomponay ô, ampianarinao anay mazava ny làlana iombonanay aminao ka hahatonga anay ho tena zanak'Andriamanitra, tsy inona izany fa ny fanatanterahana ny didim-pitiavana sy ny fitiavana namana ary ny fanajana ny tontolo iainana izay manambara ny fiombonana aminao. Koa enga anie izahay ho tia ny Rainao, ho tia ny namanay araky ny ohatra efa nomenao anay dia hivelona tanteraka ao aminao izahay ka hiadam-pinaritra, hifanasoa, hifanatsara ary hampanjaka ny rariny sy ny hitsiny, hivelona ny tena fahamarinana ao anatin'ny fihavanana marina tokoa izahay. Amen

Mompera Arserveka Mgr Benjamin Ramaroson